

2019

AÑA DI FAMILIA
Y DI CUIDO DI NOS
MUCHANAN

ISLA(•)NLINE

Diamars 2 April 2019

Email: prensa@arubagovernment.aw Tel: 528-4900


CU PERSEVERANCIA
PA NOS ISLA



GOBIERNO DI ARUBA



Isla Online
Noticia Di Gobierno


 A portrait of Minister Evelyn Wever-Croes, the Prime Minister of Aruba, smiling and wearing a black and white patterned top.
 MINISTER EVELYN WEVER-CROES
Prome Minister di Aruba

Bishita di Prome Minister na Scol Dun'un Man: INCLUSION TA PRIORIDAD PA GABINETE WEVER-CROES

Riba Dia Mundial di Conscientisacion di Autismo, Prome Minister Evelyn Wever-Croes a bishita Scol Dun'un Man. Esaki, Prome Minister a considera un dia hopi bunita di por pasa cu nos muchanan special y sinti e amor cu nan ta transmiti. Minister Rudy Lampe y Minister Dangui Oduber tambe tawata presente na e mainta aki.

“Un pisca ta desenvolve su mes bon den awa. Si bo bisa e pisca pa subi un mata riba tera, e lo no logra. Si constantemente bo ta reclama y huzga e pisca, pasobra e no por subi e mata, e pisca lo pasa henter su bida pensando cu el a faya”.

Esaki ta un comparacion cu Prome Minister a duna awe durante su bishita na Scol Dun'un Man pa enfatisa cu cada ser humano tin su habilidadnan cu e ta bon den dje. Hendenan cu autismo tambe. Ta tarea y mission di nos tur ta pa haya sa kico nos hendenan special ta bon den dje y duna nan e sosten pa nan sigui desaroya y bira miho. Ban busca e bon den cada hende, y encurashe pa e ta miho, hasta si e ta total diferente na otronan.


Maneho di inclusion di Gabinete Wever-Croes ta dirigi riba e ciclo di bida di cada ser humano. Pa no laga

niun hende atras. E maneho di inclusion ta cuminsa desde nacemento, cu e mucha mester tin atencion special di su mayornan, kendenan tin mester di sosten special tambe. Ora cu e mucha tin e edad pa cuminsa scol, e mester haya e ensiñansa cu e merece. Pa estudio avansa, lo percura hopi lihe pa e grupo di mucha aki haya mas oportunidad. E siguiente fase, ta pa habri mas oportunidad di trabou y duna nos hendenan special e sosten y guia pa nan mantene nan trabou. Den e periodo cu nan bira mas grandi, tambe nan tin mester di mas sosten y cuido y un vivienda.

Prome Minister a encurasha docentenan y mayornan cu ta cuida nos muchanan special pa nan sigui haci e trabou cu animo. Muchanan special ta muchanan cu tin habilidadnan special. Pero maestro y mayornan cu ta atende cu nan, mester tin habilidadnan hopi mas special ainda. Cualidadnan manera pasenshi, determinacion, hopi dedicacion, y especialmente un curason hopi grandi. Den number di Gobierno di Aruba, Prome Minister a gradici docentenan di Scol Dun'un man y mayornan cu ta sostiene nos muchanan special. Danki pa kere den nos muchanan y pa busca e miho den nan.






MINISTER OTMAR ODUBER
Minister di Desaroyo Teritorial, Infraestructura y Medio Ambiente

ATROBE UN BOOSHI WEVER FRUSTRA CU SU MESA BRUHA TERA Y PURBA MANCHA UN BUNITA PROYECTO DEN BENEFICIO DI NOS PUEBLO

Recientemente a anuncia un proyecto sumamente positivo pa Pais Aruba. Ta trata di un incinerador pa desperdicio medicinal, bestia morto y 'sludge'. E desperdicionan aki actualmente ta wordo procesa na un manera antigienico cu ta contamina nos aire y cu ta bay contra normanan di salud.

Mentiranan di sr. Wever

A tuma nota cu sr. Booshi Wever a haci declaracionnan tocante e tecnologia nobo aki cu Gobierno di Aruba kier implementa dentro 5 luna y a cuestiona e proyecto. Gobierno ta canando un proceso habri pa loke ta e maneho di desperdicio a largo plaso.

Actualmente tin 3 openbare aanbesteding tumando lugha cu participacion di un cantidad di compania local y internacional. E inversionnan aki ta cuantioso y pesey ta haci den forma cauteloso. lamentablemente tempo di Sr. wever e procesonan no a wordo haci cu cautela pa cual pueblo a paga mas di 35 miyon florin pa un proyecto di Boldin & Lawson cu nunca a traha den forma adecua. Al contrario, el a resulta di ta un perdida di placa di comunidad di Aruba.

Realidad di e proyecto

E proceso actual a bay a traves di un destaho unda cu 8 compania a wordo acerca door di DOW, pa cual finalmente 3 compania a reacciona. Dos di

e companianan a presenta un oferta cualnan a wordo analisa conforme e rekisitonan cu tin. A base di e cumplimento cu e rekisitonan aki a tuma un decision di cua compania ta haya e proyecto. Ambos compania tabata local (Arubiano) y den e caso aki a bay cu esun cu mas a cumpli cu e meta cu tabatin pa atende cu e problematica di e procesamiento di e desperdicio y cu e parti di medio ambiente cu tabata hopi importante. Considerando cu e procesonan tabata tuma lugha den aire liber contaminando nos aire y cu tur e consecuencianan cu esaki tin cu ne.

E fondonan uza ta fondonan cu lo a vence fin di december 2018, y ta fondonan cu a resta for di Fondo Desaroyo Aruba (FDA) cu a aloca e fondonan aki pa busca un incinerador cu por atende specialmente cu e parti di desperdicio medicinal y bestia morto. A amplia e fondo un poco mas pa por atende cu e parti di sludge cu ta un gasto grandi di DOW actualmente. E gasto anual di DOW pa deshaci di esaki ta mas o menos 1.8 miyon florin. Cu e sistema nobo aki ta bay spaar mas di 1 miyon florin pa aña riba e presupuesto di DOW. Considerando e tempo financieramente dificil cu nos ta aden, sigur por haci uzo di e fondonan aki na un forma hopi mas responsabel. E desperdicionan menciona actualmente no ta wordo maneha segun



normanan adecua y hopi bes ta kima esakinan den aire liber contaminando e medio ambiente,

Conclusion

Finalmente Minister Oduber a declara di ta lamenta cu un proyecto asina bunita y cu ta wordo haci na un forma asina transparente, caminda cu departamentonan ta cumpli cu nan deber, ta scapa placa di Gobierno y ta bin cu procesonan mas mihor pa medio ambiente. Ta haya personanan manera sr. Wever cu no conoce otro manera di hiba politica ta ataca y insulta personanan profesional local, manera esnan envolvi den e proceso aki. Y e hecho cu ta netamente un persona cu un record menos bon ta cuestiona otro hende su integridad y e un proyecto cu ta na bienestar di Pais Aruba.


GOBIERNO DI ARUBA

**Treciendo
informacion
corecto
y berdad!**

Pa mas informacion
tuma contacto na:

5284900

Minister Otmar Oduber y DOW satisfecho cu test di plateau di asphalt cu ta menos costoso cu esun klinkers

PRONTO LO MIRA MAS VERKEERSPLATEAU DEN DIFERENTE BARIO ROND ARUBA!

Manera ta conoci tin gran cantidad di peticion di parti comunidad pa pone verkeersplateau den diferente bario rond di Aruba. E peticionnan aki ta keda aumenta aworaki tambe considerando e hecho cu ta percurando pa mas y mas camindanan wordo drecha, cual ta haci cu automobilistanan ta aumenta nan velocidad tambe. Considerando cu un verkeersplateau di klinkers manera nos conoce ta costa entre 15 mil pa 17 mil pa wordo construe e ta haci hopi dificil y casi imposibel pa DOW cumpli cu e mas di 300 peticionnan cu tin.

Desde cu Minister Otmar Oduber a asumi e responsabilidad di Minister encarga cu Infraestructura el a wordo confronta cu e reto aki. A sinta cu DOW pa musta riba e importancia pa pone verkeersplateau den diferente bario y areanan di scol. Asina desde aña pasa a cuminsa traha riba ideanan nobo y a sondea ehempelnan di diferente otro Pais, cual a conduci na e opcion di verkeersplateau di asphalt.

Cu e budget cu DOW tabatin ta solamente 10 pa 15 di e verkeersplateau nan di klinkers lo por wordo traha pa aña. Aworaki ta calcula cu entre 40 cu 50 di nan lo por wordo traha pa aña y kisas mas!, Minister Oduber a splica. Algo importante segun Minister Oduber ta e aspecto di visibilidad di e plateau pues, tin indicacion di e plateau riba caminda por medio di borchinan cu comunidad ta custuma di wak, pero awor e plateau ta pinta cu strepinan blanco, reflectors y bliksemflits pinta riba e caminda cu ta avisa e automobilista cu e ta acercando un verkeersplateau y cu e mester baha velocidad. Tur e

aspectonan aki ta contribui na seguridad di e manehadonan y di habitantenan y muchanan den e bario y/ of area di scol cu pone esakinan.

Banda di cu e costo di construccion ta mas abou, e costo di mantencion tambe ta mas abou como cu ta e liñanan riba e plateau solamente mester wordo pinta of haci limpi pa percura pa nan ta keda visibel. Pa cual ta sondeando tecnologia nobo na e momentonan aki tambe pa percura cu e color di verf por keda limpi y visibel pa mas tempo.

Desde maart lo ranca sali cu e modelo di verkeersplateau aki cu prioridad segun inventario di DOW iniciando cu scolnan. Minister Oduber a duna di conoce cu kier logra cu den e prome 6 lunanan cu tur scolnan por tin verkeersplateau pa brinda proteccion na muchanan y mayornan, pa despues poco poco bay den diferente bario, mientras cu e trabou di DOW ta sigui den diferente bario rond Aruba.


Marlon Croes Director di DOW a splica cu enberdad den pasado a haya hopi peticion pa bin cu medidanan pa calma e velocidad di trafico den barionan y specialmente rond di scolnan, pa cual a cuminsa atende cu e peticionnan aki, pero e gastonan tabata halto. Actualmente a traha dos diferente modelo cu ta diferencia di otro di e hanchura di e plateau. Esun cu normal ta traha ta 4 meter hanchu cu su subida y bahada, y e version chikito ta entre 1 meter pa 1.20 meter.

Esaki ta duna e departamento espacio pa reduci gasto y traha mas plateau pa yuda e barionan. Cu e modelo di plateau anterior e duracion



di trabou tabata 1 anochi, mientras cu aworaki por traha e plateau grandi di asphalt den mitar dia y esun mas chikito den menos cu mitar dia.

Pa conclui sr. Croes di DOW a bisa cu pa awo esaki lo ta Aruba su diseño di plateau y si ta necesario por haci ahustacion den future.


 A portrait of Minister Xiomara Ruiz-Maduro, a woman with dark hair wearing a yellow jacket, smiling. The background features a stylized geometric design with blue and yellow lines.
 MINISTER XIOMARA RUIZ-MADURO
Minister di Finansa, Asuntonan Economico y Cultura

UNOCA MESTER YUDA CONSERVA NOS PAPIAMENTO, NOS MUSICA TIPICO Y NOS HERENCIA CULTURAL INTANGIBEL

Minister Ruiz-Maduro a reuni cu directiva di UNOCA pa haya sa mas di nan plannan relaciona cu e sosten financiero cu nan ta brinda, usando fondonan publico pa realiza proyectonan cultural na nos Pais. Pa aña 2019, UNOCA ta conta cu un suma di 900,000.= florin di Gobierno pa por funciona y subsidia proyectonan di persona of instancia cu ta acerca UNOCA cu peticion pa sosten financiero.

Den e reunion Minister Ruiz-Maduro a enfatisa e importancia cu su persona kier duna na proyectonan cu tin como meta pa tene nos idioma Papiamento bibo. Nos idioma ta importante y ta uni nos como Pais. Pa e motibo aki proyectonan cu ta contribui na un miho uso y na desaroyo di nos idioma mester por conta cu sosten financiero di UNOCA.

Minister Ruiz-Maduro ta pidi atencion special pa proyectonan cu ta contribui na conserva herencia cultural inmaterial di nos Pais. Nos musica tipico tambe ta forma parti di nos cultural intangible. Pesey ta importante y necesario pa nos haci mas esfuerzo pa conserva e genero musical aki, pa e no bay perdi. Aki ta unda a musta UNOCA tambe riba e importancia cu por ehempel e documentario di Dande, cu ta den ehecucion, tin pa nos Pais. Den e documentario aki, ya pa dos aña sigui a filma nos cantadonan di Dande riba dia di aña nobo, pa asina por documenta e tradicion cultural aki 'en vivo' y pa conserva historia, canto y e custumbenan relaciona cu e celebracion aki den temporada di fin di aña na Aruba.

E mandatario a pidi UNOCA pa duna mas informacion na e sector di cultura entre otro pa reuni cu gruponan tipico y e centronan di bario, pa asina nan por sa kiko ta e rekisitonan pa por ricibi yudansa financiero pa nan proyectonan. Esaki lo haci presentacionnan cultural mas accesibel pa pueblo en general. Cultura nos mester bib'e.

Pesey Minister Ruiz-Maduro ta trahando hunto cu UNOCA y tur otro instancia cultural cu ta ricibi subsidio di Gobierno por brinda e sosten financiero y e tarima necesario pa Pueblo di Aruba por disfruta di locual ta forma parti di nos cultura.



REUNION CU SRA. MILLY SCHWENGLE COMO STAATSRAAD PA ARUBA NA RAAD VAN STATE HULANDA

Minister Ruiz-Maduro a reuni cu sra. Milly Schwengle kende ta representa Aruba como Staatsraad den Raad van State na Hulanda. Den e Organo Halto aki na Hulanda, sra. Schwengle ta representa e interesnan di Aruba den e Departamento di Consejo.

Den e reunion a repasa e esfuersonan cu Gabinete Wever-Croes ta haciendo riba e tereno financiero y economico. E mandatario a duna un relato di e reunionnan hiba recientemente cu e companianan di rating

Standard and Poors' y Fitch, e Cuentanan Nacional y tambe e evaluacion positivo di IMF su Article IV mission pa Aruba. Di e manera aki Minister Ruiz-Maduro ta spera di por brinda sra. Schwengle como representante pa Aruba tur informacion relevante pa Aruba su representacion den e organo importante aki.

Minister Xiomara Ruiz-Maduro a probecha e ocasion pa brinda sra. Schwengle un regalo chikito pa semper e por tin Aruba presente durante su trabao na Hulanda.



**Minister di Finanzas,
Asuntonan Economico y Cultura**



**DIA DI
CONSCIENTISACION DI
AUTISMO**

— 2 di april 2019 —

AMOR • SPERANSA • ACEPTACION

MINISTER GLENBERT CROES

Minister di Asunto Social y Labor



Awe ta un dia sumamente special. Awe mainta 6.30 am a dal start e di 12 grupo di SVT. Un cantidad di 20 hoben a cuminsa awe cu yen entusiasmo cu nan trayecto. Formacion Social kier a desea tur e hobennan masha exito cu e reto nobo aki

Nos lo apoya Jessica Ras di SVT...nos lo apoya nos ARUMIL y nos lo apoya nos Hobennan nan Futuro Nobo.
100% FORMACIÓN SOCIAL....



MAS O MENOS 60 PAIS CU PROHIBICION PA SUTA MUCHA

Mientras cu aki na Aruba ta completamente permitibel pa suta bo yiu, tin mas o menos 60 Pais rond mundo unda tipo di actonan asina ta ilegal. Ademas cu e topico aki ta bastante controversial, e ta trece hopi pregunta dilanti.

Segun UNICEF, disciplina violento den un hogar ta e forma mas comun di violencia cu muchanan ta sufri di dje. Cu esaki bisa, tin mas cu mil miyon di ciudadano riba mundo cu ta bisa cu castigo fisico ta necesario pa cria y educa muchanan adecuadamente. Algun Pais cu a pasa e ley contra sutamento di mucha ta e.o. Albania, Argentina, Bolivia, Costa Rica, Croacia, New Zealand, Peru, Portugal y Hulanda.

Desde 2006 ora cu "World Report on Violence against Children" a recomenda pa prohibicion di violencia fisico contra mucha, e number di Paisnan cu a prohibi castigo corporal a triplifica. Pa esunnan cu no sa, sutamento di mucha ta consisti di klap, dal, sacudi of tur otro castigo fisico cu man of cu cualkier obheto. Durante e ultimo temponan a cuminsa conseha mayornan pa stop di klap, dal of comete cualkier acto di violencia fisico cu nan yiu(nan).

Kico bo ta pensa di esaki?

Mester permiti sutamento di mucha of mester prohibi esaki?

No ta tur hende ta bay comparti e mesun opinion cu sutamento di mucha mester por wordo permiti of juist mester wordo prohibi, pero si nos por ta di acuerdo cu otro, cu tin biaha esaki por bay fo'i man y pa esunnan cu ta comete esaki, mester asumi na e consecuencianan.



BUSCANDO TRABAJO?

Si bo ta interesa pa solicita pasa libremente di dialuna pa diabierna entre 7:30 cu 11:00 am na DPL Seroe Blanco 4.

Mester acudi cu Cedula of un papel di Censo di fl.5,- pa wordo atendi. #dplaruba
Nos TEAM ta cla pa yudabo haya un Entrevista Laboral!



Oportunidad pa Trabou Solicita na DPL

Adv Construction: Ijzervlechter - Timmerman
Delux Real Estate: Timmerman - Sales Rep/adm
Mango: Head Visual Merchandiser
Sayo Supermarket: Helper (verpakster)
Jehova Jireh Beauty Salon & Barber Shop: Schoonheidsspecialisatie
Amsterdam Manor Beach Resort: Beach Attendant - Cook Helper - Store Room Keeper - Room Attendant
The Turtle cove: Bartender
Glamour Unisex Beauty Salon NV: Estelista Profesional Integral
Los Recuerdos de Ella Bar Restaurant: Bartender
Grind Coffee House: Cook
Abba Spa and Beauty Salon: Manicuriste
Lady Bugs Apartments: General Manager
Salina 2: Purchasing Manager
Generation 2000 NV: Manager
Super Shopping: Cashier
Tropical World Island: Retail Manager
Eelens Consultancies: Consultant Global Health
Fung Shung Restaurant: Barbediende
Euro Car Services: Automonteur
Natura Development: Architectural Projectural Superintendent - Project Superintendant
Tof Twist of Flavors Restaurant: Restaurant Manager - Kitchen Helper

Crave: Cook
Opus Ocean & Grill: Cook
Bubali Bliss: Cleaner
Renaissance Aruba Resort & Casino: General Manager
Arubian Garden NV: Tuinman
Pizza Hut: Pizza Cook
Autofinishing Technique: Autospuiter
Stichting Algemene Bejaardenzorg
Aruba: Beleidsmedewerker Gezondheidswetenschappen
Eco Fauna Control NV: Engineer - Pest Control Technician
Aruba Sport Unie: Colobrador Administrativo
Ironwall Security: Bewaker
Conservim Construction: Welder
Elsa's Flowershop NV: Bloemist/Florist
Perfect Landscaping NV: Tuinman
Udachi Cleaning and Services: Supervisor
Geerman Garage & Body Shop: Auto Monteur
Costa Linda Operating Company: Houseman
Alu Glass Hardware Supplies: Installateur
Gari & Wasabi: Chef
Stilzam Corporation: General Manager
Panaderia Moderna: Bakker Helper
Cheng's Supermarket: Shelfpakker
Animal Health Veterinary Hospital: Dierenarts

Lejuez Brothers International Aruba: Driver (Delivery)
Combination Garage: Diesel Monteur
Safecom Security NV: International Business Coordinator
Hung Paradise: Kok Helper
Wei Tai Kitchen: Kok
Ling's Restaurant: Barbediende
United Home Center: Lijstenmaker
Reflexions Beach Bar & Restaurant: Serveerster
Driftwood Charters: Marine Mechanic
More 4 Less: Auto Uitduiker - Auto Spuiter
Avedis Security: Security Officers
Sweet Garden Restaurant: Counterbediende

MINISTER ARMANDO LAMPE

Minister di Enseñansa, Ciencia y Desaroyo Sostenibel



MINISTER DR. ARMANDO RUDY LAMPE A HACI UN BISHITA NA SCOL DUNUNMAN

Diamars 2 april Minister dr. Armando Rudy Lampe a haci un bishita na Scol Dununman, na unda cu a organiza un actividad pa celebra dia internacional di concientizacion pa cu Alhiemer (WAAD: World Autism Awareness Day).


Akinan conhuntamente cu Minister president sra. Wever-Croes y cu colega Minister sr. Dangui Oduber, Minister Lampe a presencia e celebracion, cu tabata uno cu hopi amor y cariño di esnan presente. Na unda cu despues di canto, declamacion di poesia y diferente speechnan di esnan presente, e invitadonan por a sinta y mira un video cu a wordo prepara, specialmente pa e dia aki.

Tambe presente tabata tey algun mayor y tambe representantenan di La Cabana Resort cu a keda impreciona, cu e presentacion completo y a vocifera cu nan sigur lo kier sigui coopera y duna mas ainda, pa yuda den e desaroyo di tur e studiantenan di Scol Dununman. Minister Lampe tambe na final a agrega cu e tambe ta bezig ta formalisando e contiuidad di estudio pa cu e muchanan di Scol Dununman, cu despues di nan 16 aña di edad, lo mester yega final di nan periodo di estudio na dicho scol.

Na final tur esnan presente a keda hopi contento di e mainta cu sigur a funciona como un concientizacion personal y cu nan lo purba di sigui haci nan esfuerzo pa transmiti e mesun amor y devocion cu e maestro y staff di Scol Dununman a presenta, sperando cu hopi mas hende pa sigui coopera cu e scol y su metanan pa cu nos muchanan special.






MINISTER DANGUI ODUBER
Minister di Turismo, Salud y Deporte

MINISTER DANGUI ODUBER: E CAPASIDAD DI ASIENTO PA VUELONAN FOR DI MERCA TA SIGUI CRESE!



Minister di Turismo sr. Dangui Oduber ta elabora riba e ultimo cifranan cu su Ministerio a ricibi di Aruba Airport Authority (AAA). Aruba su Turismo ta pasando den un di su miho momentonan, tur indicador ta positivo y ta superando tur obhetivo.

Seat Capacity 2018

Na aña 2018 e capacidad di asiento pa e mercado Estadounidense a surpasa 1 miyon di asiento pa prome biaha den historia. E mercado Estadounidense ta keda esun di mas grandi cu ta 67% di nos bishitantenan. E mercadodi Latino America ta e di dos mas grandi cu 16% sigui pa esun Europeo cu 7%. Otro mercadonan ta e mercado Caribe Hulandes cu tin 6% y Canada cu tin 4% segun cifranan di 2018. Mayoria di e vuelonan pa Aruba ta sali for di Miami, New York, Curacao, Newark y Bogota segun e cifranan di 2018.

Aña 2019 ta premira pa bira un aña record den turismo, e capacidad di asiento Estadounidense lo bay surpasa e capacidad di asiento di aña 2018. Minister Dangui Oduber a expresa di ta satisfecho cu e cifranan ricibi di AAA. Gobierno lo bay sigui explora pa habri mas destinacion pa asina sigui aumenta e capacidad di asiento pa Aruba.


U.S Arrivals

Capacidad di asiento pa vuelonan for di Merca a beat e 1 Million target den 2018 y ta pronostica pa sigi aumenta den 2019!

Top 5 Airlines serving Aruba:


JetBlue- American Airlines- United- Delta-Southwest

Scheduled Capacity U.S Market 2008-2019



U.S Direct Flights to Aruba

New York - New York City
 Massachusetts - Boston
 Florida - Miami/ Fort Lauderdale
 New Jersey - Newark
 Georgia - Atlanta
 Texas - Dallas
 Illinois - Chicago
 Pennsylvania - Philadelphia
 North Carolina - Charlotte
 Maryland - Baltimore/Washington



Minister di Turismo,
Salud y Deporte

Gobierno di Aruba

Source: Aruba Airport Authority




MINISTER DANGUI ODUBER A HACI UN BISHITA NA SCOL DUN'UN MAN

Diamars 2 di april Minister di Salubridad Publico sr.Dangui Oduber a bishita scol Dun'un Man na Piedra Plat riba dia mundial di conscientisacion di autismo. Scol Dun'un Man ta un scol basico di enseñansa special pa alumnonan cu dificultad pa siña. Na scol Dun'un Man tin 30 alumno diagnostica cu autismo. Autismo no ta un inhabilidad, e ta un habilidad diferente.

E meta di scol Dun'un Man ta pa ofrece enseñansa y guia adapta na e alumno caminda ta tene cuenta cu su nivel y posibilidad. Integracion y funcionamiento optimal den nos comunidad ta hunga un rol esencial. "Awe ariba un dia special nos a bay musta nos sosten y brinda apoyo na nos muchanan special, mester yuda scolnan asina aki" e mandatario a expresa.

E muchanan a keda masha contento ora nan a ricibi nan blaas blauw hunto cu nan donut blauw for di e mandatario. Minister Oduber ta aplaudi cada maestro di scol Dun'un Man pa e bunita trabou cu nan ta haciendo cu e muchanan, sigur un trabou hopi noble. Di parti di Gobierno nos lo sigui aloca e fondonan necesario pa mehora cuida en general na Aruba, poniendo e ser humano central asina e mandatario a trece dilanti.





MINISTER CHRIS ROMERO
Minister di Transporte, Comunicacion y Sector Primario

PANORAMA AGROPECUARIO TA PASA TUR DIARANSON ANOCHI DURANTE TELENOTICIA NA TELEARUBA

Tin hopi desaroyo den nos Sector Primario y como tal Ministerio di Transporte, Comunicacion y Sector Primario a pone como meta pa mantene nos comunidad informa debidamente.

Panorama Agropecuario ta un segmento informativo presenta pa Departamento di Agricultura, Cria y Pesca/Santa Rosa den colaboracion cu Ministerio di Transporte, Comunicacion y Sector Primario. Aki lo duna informacion di tur loke ta trata nos Sector Primario

Presenta pa sr. Randy Maduro, tur diaranson anochi Panorama Agropecuario lo trece informacion di e diferente desaroyo y adelantonan cu ta pasando den nos areanan di agricultura, cria y pesca. Tur diaranson durante e edicion di Telenoticia, na Telearuba, lo bo disfruta di un edicion nobo di Panorama Agropecuario!





**IMF TIN
CONFIANSA
DEN ARUBA**



Publicacion **IMF**:
www.imf.org
Dialuna april 1, 2019

RECOMENDACION Y CONCLUSION DI **IMF**

1. E reforma fiscal y e pasonan pa sana e situacion financiero ta hopi positivo, y ta pidi atencion tambe pa gastonan di salario den Gobierno, y gastonan di AZV.
2. E maneho economico y e 6 sectornan prometededor ta mehora e evaluacion pa Aruba, den nan diversificacion di turismo, agricultura, etc. y IMF ta hopi satisfecho cu Gobierno tin plannan pa mehora 'ease of doing business'.
3. Turismo ta creciendo, y mester diversifica. Nan ta recomenda pa Aruba sigui concentra riba brinda calidad halto di servicio
4. Inversionnan den infraestructura ta positivo
5. Siguridad y nos sistema legal ta sigui ta factornan importante pa atrae inversionista
6. Tene cuenta cu aspectonan social
7. Percura pa enseñansa ta alinea cu e necesidadnan riba mercado laboral, pa prepara hobennan cu 'vocational training', y brinda miho proteccion na e trahado
8. IMF ta encurasha nos Gobierno pa continua cu e plannan pa combati corrupcion
9. IMF ta positivo riba e progeso cu a wordo haci pa cu data y estadistica a traves di e cuentanan nacional

**“No ta facil, pero den union nos lo enfrenta e retonan nos dilanti,
y nos lo saca nos pais padilanti. Cu vision y determinacion
nos lo crea progreso y bienestar pa tur ciudadano di nos pais”.**

Prome Minister Evelyn Wever-Croes:

Estrechando lasonan pa bienestar y progreso:

PREMIER DI ARUBA TA ATENDE DISCURSO DI PREMIER DI SINT MAARTEN

Diahuebs mainta Premier Evelyn Wever-Croes a atende e discurso di Premier di Sint Maarten Leona Marlin-Romeo na Universidad di Aruba. Premier Marlin-Romero tambe tawata orado na e Prome Conferencia Internacional riba 'Small Island States' (SIS) 'Subnational Island Jurisdictions' (SNIJs) cua conferencia a hiba e tema 'Sharing Stories of Island Life, Governance and Global Engagement'.

Premier Marlin-Romero a comparti e experiencia di Sint Maarten despues di orcanan Irma y Maria na 2017 y a duna motibonan di con ta asina importante pa ta prepara, no solamente pa e desaster natural, sino tambe pa re-construi un pais di e efectonan di e desaster. Prome Minister Evelyn Wever-Croes ta expresa cu e puntonan cu Premier Marlin-Romero a

trece den su discurso sigur por ta di gran ayudo pa Aruba den caso di eventualidadnan di e extremo manera cu a pasa na Sint Maarten.

Ta di remarca cu Prome Minister Evelyn Wever-Croes y Prome Minister Leona Marlin-Romeo a asumi nan responsabilidad como Prome Minister di nan pais cu solamente algun luna di diferencia. Y inmediatamente e dos mandatarionan a cuminsa estrecha e lasonan di amistad entre Aruba y Sint Maarten.

Na mundo tin actualmente 11 Presidente femenino y 10 Minister Presidente femenino. Reino tin 2 di e 10 Minister Presidente femenino! Y por bisa cu ambos Prome Minister tin interesnan comun pa trece bienestar y progreso pa Sint Maarten y Aruba respectivamente.



Prome Minister Evelyn Wever-Croes:

BISHITA DI PROME MINISTER RIBA BARCO ZR. MS. ZEELAND

Den siguiente simannan barco di Marina Hulandes lo patruya nos lamanan

Dialuna siman pasa, Premier Evelyn Wever-Croes a bishita e barco Zr. Ms. Zeeland, di Marina Hulandes. Zr. Ms. Zeeland ta un barco bon ekipa cu tarea pa patruya y brinda proteccion na fronteranan pa nos islanan den Caribe.

E siguiente simannan Zr. Ms. Zeeland lo patruya nos lamanan. Esaki ta den cuadro di esfuersonan pa hunto cu Reino Hulandes tene miho control di nos fronteranan.

Prome Minister a haya un splicacion bastante amplio di tur aspecto di defensa cu e barco ta contene pa proteccion y deteccion di actividadnan ilegal den nos awa y costanan. Tur ekipo ta hopi sofisticada, incluso tin un helicopter bon ekipa riba e barco.

Siguridad di nos costanan pa Gabinete Wever-Croes ta un prioridad halto.



Prome Minister Evelyn Wever-Croes:

PREMIER WEVER-CROES A REUNI CU REPRESENTANTENAN DI UNION EUROPEO

Gabinete Wever-Croes logrando financiamentonan importante pa desaroyo

Gabinete Wever-Croes su meta ta pa mantene bon contacto y bon relacion di cooperacion cu Union Europeo y ta crea confiansa cu instancianan internacional. Esaki sigur ta un empuhe pa nos pais realisa proyectonan grandi den e area di innovacion especialmente. Innovacion lo empuha desaroyonan na Aruba entre otro crecimiento economico y desaroyo di enseñansa.

Dialuna siman pasa, Premier Evelyn Wever-Croes a reuni cu Embahador di Union Europeo sr. Jerney Videtic y Hefe di Cooperacion sr. Karel Lizerol, relaciona cu varios proyecto cu Aruba ta purba logra via Union Europeo.

Union Europeo ta financia, entre otro e facultad nobo na Universidad di Aruba SISSTEM. Aruba ta haya 13.05 miyon Euro for di Fondo di Desaroyo Europeo pa realisa e proyecto aki. Prome Minister a enfatisa cu esanki no ta un fianza, sino un regalo pa nos Pais.

SISSTEM lo brinda mas oportunidadnan pa nos hobennan por desaroya aki na Aruba mes den e profesionnan di futuro. Esaki a bira posibel despues di re-negocia intensamente cu Union Europeo. Gabinete Wever-Croes a presenta un plan realistico y cu contendio y a crea confiansa cu nos ta un Gobierno serio.

Ya caba Union Europeo a financia e Mo-B Bus di Innovacion cu ta pasa varios scol pa siña nos hobennan cera conoci cu tecnologia. Den apenas algun luna mas



di 2000 hoben a subi e Mo-B Bus.

Tambe Gabinete Wever-Croes ta den deliberacion pa financiamiento den caso di e

crisis migratorio di Venezuela. Tur ayudo cu Aruba por haya pa e problematica aki, ta bon bini mirando cu Aruba e herada un situacion financiero hopi malo.

Gabinete Wever-Croes su meta ta pa Aruba desaroya riba tur tereno apesar di tur reto. Y riba esaki nos ta den e bon caminda.



GOBIERNO DI ARUBA

SEGUN IMF

2017	2019
Growth is Weak	Outlook is Broadly Positive

Danki na vision di Gabinete Wever-Croes



Publicacion IMF:
www.imf.org
 Dialuna april 1, 2019



GOBIERNO DI ARUBA

un
Feliz Dia

ISLAONLINE
PA INFORMACION
CORECTO Y BERDAD

Gabinete Wever-Croes